



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

26. Kalenderwoche – ab 26. Juni 2011

Ballagg

Nee, das is ja wergrisch... - dud doch dähr Jogi Leew dähn Ballagg aus dor Nadsjonalmannschafd nausschmeißn! Ganz kuhl - eene Bressemiddeilung un finido! Dschiß, mir brauchn disch nisch mähr! Ausgemusdord!

Ährlich, an dähm Ballagg seinor Schdelle däsich misch ooch schon e bißl gelaggmaird fiehln. Ge-Ballagg-maird - sozusachn!

Eene Schangse hädde dähr irschendwie vordierend! Bei soviel Besch wie dähr gehabd had! Das Besch had dähm ja reschleschd am Ladsch geglähd! Wie Hundekagge!

Das is ja bei dähr eene Weldmeesdorschafd, wose se zweedor gewordn sinn, da ging das los. Da war dähr fiehrs Endschiel geschberrd. Weeschn eim bleedn Faul, wassor im Schbiel vorhähr machn mussde. Da had dähr sisich offgeobford! Ieborhaubd - immor is dähr mid volln Einsatz bei dor Sache gewähns - in dor Nadsjonalmannschafd!

Un wenn dähr im Endschiel dabeigewähns sein dädde, dann dädn mir villeischd schon seid dazumals Weldmeesdor sein. Un wennor bei dor ledzdn Weldmeesdorschafd nisch vorledzd gewähns sein dädde... womeeschlich häd morsch da geschaffd. Abor nee, ohne Ballagg is nischd gewordn. Un nu hamse dähn aussordierd. Nu kann dährs nisch nochma brobiern.

Guhd, ähr is nu jedzde nisch mähr dor Jingsde - so fiehr een Schbordlor! Ansonsdn sin 34 Jahre nadihrlisch noch kee Aldor! Un es dud viele Fußballor gähm... ganz beriehmde... die ham alle

noch geschield, wose so ald warn. Abor nee, dor Jogi Leew dud gahr nisch erschd nochma brobiern, ob dor Ballagg noch nidzlich sein kennde. Un irschendwie gloobe isch, dähr Leew had da nisch reschd. Dähr Ballagg däde beschdimmd mid seinor Erfahrung ganz guhd in so eene junge Drubbe neinbassn! Odor...?

Isch meene, das had jedzde ma nischd dadermid zu dun, dass dor Ballagg fasd sowas wie e Gemnidzor is... ma so schbordlich gesähn... nisch gebierdisch!... abor ähr is ja als Schbordlor in Gemnidz losmarschierd... in de Weld! Bis nach Schellsieh London!

Odor wolln die jung Schdars in dor Mannschafd dähn Ballagg nisch mähr? Kenn die dähn villeisch nisch leidn? Un dor Jogi Leew machd jedzde bloß das, was die Jingoren wolln dun? Villeischd sin die Jingoren froh, dass dähn Ballagg jedzde los sin?

Nascha, das kennde mor off eene gewisse Ard ja ooch widdor vorschdehn... wenn de Jung nach ohm drängeln dun... - abor e Drähnor muss doch das Ganze sähn... de Mannschafd... de jung un de aldn! De greeßdmeeschliche Gambfgrafd mussor doch wolln!

Off dor annorn Seide gloob isch, dass wenn die jung Schdars alle gesachd häddn, mir wolln dähn Ballagg ham, dann hädde dor Jogi Leew dähn Ballagg ooch nochma genommm! Nee, da is nisch bloß dor Jogi Leew, dähr dähn Ballagg nisch mähr will. Da hald isch jede Wedde!

Eduard Sachsenmeyer